



Inatsisartuni ilaasortaq  
Justus Hansen  
/MAANI

**Naalakkersuisunut apeqquut: Aasap qaammataani (takornariat angalanerpaaffianni) timmisartumik angalanermut ilaasunut akitsuutit Naalakkersuisunit qaffanneqassasut, tusagassiorfinni inunnillu tamanit pisussatut isumaqarfigineqalereerpoq. Akitsuutit taaneqartut Naalakkersuisut qaffanniaaraat ilumoorpa, aammalu tamatumunnga suna peqqutaava?**

02.02.2010  
Sagsnr. 2010-024962  
Dok. Nr. 302313

Asasara Justus Hansen,

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: [aan@gh.gl](mailto:aan@gh.gl)  
[www.nanoq.gl](http://www.nanoq.gl)

Timmisartumik angalanermut ilaasunut akitsuutit qaffanneqarniarnersut aammalu tamatumunnga suna peqqutaanersoq pillugu Naalakkersuisunut apeqquateqarputit.

Maannakkorppiaq Mittarfeqarfiit akinut akiliisarnermullu malittarisassiaannik misissueqqissaartoqarmat, aammalu tamatumunnga atatillugu aasaanerani ukiuuneranilu akinik assigiinngitsunik atulersitsinissaq sulissutigineqarmat ilumoorpoq. Tassami timmisartoqarfiit silaannakkut assartuussinerup niuerutigineqarnerani pingaaruteqarput, taakkunungalu akitsuutit aningaasartuutit, silaannakkut angallasseqatigiiffinnut akilersinneqartartut ilaannut matusissutigineqartarpoq, taamaalillunilu naggataatigut ilaasut timmisartunut biliitsinut akit aqutugalugit akiliisinneqartarlutik.

Erseqqissarneqassaaq, timmisartut tikittut aallartullu, kiisalu ilaasut nassiussallu sullinneqarnerat, taamaalillunilu timmisartuutileqatigiiffiit silaannakkut assartuussinermi sullissinerannik naammassinnissinnaanerup anguneqarnissaa Mittarfeqarfiit pingaarnertut suliassarimmassuk suliffeqarfimmilu ingerlatassaralugu. Timmisartoqarfiit timmisartunik ingerlatsinermut, kiisalu ilaasunik nassiussanillu sullissinermut atatillugu atortussanik kiffartuussinermillu arlalinnik siunertamut tamatumunnga atugassiisarput, suliassaqarfinnullu immikkut ittunut taakkunungalu aningaasartuutit timmisartoqarfinnut akitsuutit aqutugalugit matussuserneqartarput.

Siunissamut ungasissumut aningaasaqarnikkut suliniuteqarnerup ilaatut suliffeqarfiit imminnut ingerlattut aningaasaqarnikkut nammineerneruleriartortussaapput. Tamatuma kingunerisaanik aallaqqaammut assersuutigalugit akisussaaffik aalajangiisarnermilu oqarsinnaatitaaffik ingiaqatigiittussaapput, aammalu suliffeqarfiit imminnut ingerlattut suliffeqarfik isumannaarniarlugu aningaasaatiminnik isumannaarinissamut periarfissaqarput.

Suliffeqarfiit niuernikkut piumasaqaatit tunngavigalugit ingerlatsinissaat ullumikkut – aammattaaq suliffeqarfinnut imminnut ingerlattunut – piumasaqaatigineqarpoq. Taamaattumik Mittarfeqarfiit isertitaqarsinnaanermit tunngavissaminnik isumannaarisussaapput. Mittarfeqarfinni akinut akiliisarnermullu malittarisassat tunngavigalugit timmisartoqarfiit ingerlanneqarnerisa ingerlaannarnissaanut

isertitassatigut tunngavissat qaffanneqarnissaat sulissutigineqarpoq. Taakku saniatigut akit qaffanneqassapput, ilaatigut timmisartoqarfinni atortut taarserneqarnissamik pisariaqartitsiviusut aningaasalersorneqarnissaat qulakkeerniarlugu, ilaatigullu aningaasat naleerukkiartornerat nalinginnaasoq malinnaaffiginiarlugu.

Kontomut pingaarnermut 73.93.02 'Mittarfeqarfiit', oqaasertaliussani, ukiumut 15 mio. koruunit atugassiissutigineqartut iluanni qatserinermi annaassiniartarnermilu atortut annerusut, aputaajaatit, qamutit assakaasullit orsersuinernut atorneqartartut, kiisalu attaveqaqatigiinnermut sumiissusersionermullu atortut taarsersornissaannut aningaasalersuutissatut, Mittarfeqarfinni akinut akiliisarnermullu malittarisassani akit qaffannissaannut Naalakkersuisut periarfissinneqarput.

Siusinnerusukkut oqaatigineqareersutut akit assigiinngitsut atulersinneqarsinnaanerinit periarfissat misissorneqarput. Timmisartoqarfiit atorneqarnerat aasaanerani annertunerpaajusarpoq, taamaattumillu eqaatsumik aaqqiinissamut, tamatumunngalu atatillugu Mittarfeqarfiit aningaasartuuteqarnissaannut pisariaqartitsineq annerusarluni. Paarlattuanik ukiuunerani isertitaasartut, ukiuunerani timmisartortarnerup annikinnerusarnera pissutigalugu aningaasartuutiviusartut matussusernissaannut inorsartoqangaatsiartarpoq. Tamanna pissutigalugu ukiuunerani aasaanerani timmisartoqarfinnut akitsuutit assigiinngitsut atulersinneqarnissaat nalilersuiffigineqarpoq.

Akit assigiinngitsut atulersinneqarnissaat aalajangiunneqassappat, timmisartuutileqatigiiffiit tamarmik ukiuunera aasaaneraluunniit apeqqutaatinnagu assigiimmik akiliisinneqartalissapput. Timmisartuutileqatigiiffiit assigiinngitsut akinut akiliisinneqartarnerini assigiinngisitsisoqassanngilaq.

Takornariaqarnermut, pingaartumillu Kujataani Tunumilu angallavinnut, aammalu nunani allani ingerlatseqatigiiffiit nunatsinni angallassinissamut piumassuseqarnerannut tunngatillugu eqqarsarnartoqartitsinerit apeqquteqarninnut tunngavilersuutigaat.

Timmisartuutileqatigiiffiit nunap iluaneersuunerat nunanilluunniit allaneersuunerat apeqqutaatinnagu Mittarfeqarfiit timmisartunik tikittunik aallartunillu, kiisalu ilaasunik nassiussanillu sullissisussaapput, taamaalilluni timmisartuutileqatigiiffiit silaannakkut angallassinermi sullissinermik naammaginatsumik tunniussisinnaassammata.

Neriuppunga matumuunakkut apeqqutitit tamakkiisumik akisimassallugit.

Inussiarnersumik inuulluaqqusilluta

Jens B. Frederiksen